

Mensahe 6

Ang Tiunayng Kahulogan sa Basahon sa Mga Maghuhukom ug Ang Apostasiya sa Israel sa Pagsimba Nila sa Dios

Basahong Kasulatan: Huk. 1:1; 2:1; 17:1-5; 18:1, 30-31; 2 Tes. 2:2-3; 2 Ped. 1:3-21; 2:1, 15

I. Masayod gyod unta ta sa tiunayng kahulogan sa basahon sa Mga Maghuhukom:

- A. Ang pagpakisayod sa Israel ni Jehova sa Mga Maghuhukom 1:1-20, nagsaysay sa matahom nga talan-awon sa pagsalig sa Israel sa Dios; kining matahom kaayong hulagway sa pagkausa nila sa Ginoo, nga naghulagway-daan sa organicong pagkausa sa Dios sa Iyang katawhan, sumpay sa pagkausang naa sa basahon sa Josue sa pagsulod gyod sa katawhan sa Israel sa maayong yuta nga gisaysay sa Josue 6—Num. 27:21; 1 Sam. 22:10; 23:9-10; 2 Sam. 2:1.
- B. Segun sa tibuok ginsakpan sa Daang Tugon, nakigminyo ang Dios ni Israel didto sa Bukid sa Sinai—Exo. 20:6, nota 2:
 1. Sa hunahuna ug tinguha sa Dios, gusto Siyang mahimong Bana sa Israel, ug gusto Siyang maasawa Niya siya, nga magkinabuhi nga labing suod nga makigkontak Niya ning matahom kaayong pagkausa sa kaminyoon.
 2. Sa pagsulat sa mga basahon sa kasaysayan, gibutang ni Samuel ang Mga Maghuhukom sunod sa Josue aron ipakita kanato ang kinabuhing gikinabuhi sa Israel ngadto sa iyang Bana.
 3. Segun sa gipadayag sa Mga Maghuhukom, walay tinguha ang Israel nga maasawa ni Jehova; gibiyaa niya ang Dios nga iyang Bana ug naggawi ingog puta nga nagtinguha sa ubang mga dios ug nisimba niini—2:11-13, 17; 3:7; 8:33; 10:6; itandi Jer. 11:13; Ezeq. 16:25-26; Os. 1:2; 2:2.
- C. Sa naasoy na ang kalabot ni Juda ug ni Caleb sa Mga Maghuhukom 1:1-20, napuno sa pagkadunot ug pagkadaotan sa puta ang kasaysayan sa Israel segun sa nasulat ning basahona:
 1. Samtang basahon sa kasaysayan sa Israel ang Josue nga puno sa kahibulongang mga kadaogan batok sa mga lumulupyong sa Canaan diha sa presensya ni Jehova, basahon sa kasaysayan sa Israel ang Mga Maghuhukom nga puno sa makaluluoyng mga kapildihang nahiagoman nila sa ilang mga kaaway tungod sa pagbiya nila ni Jehova.
 2. Kini ang tiunayng kahulogan sa basahon sa Mga Maghuhukom.
- D. Tinagik ang sulod sa Mga Maghuhukom sa pagsalig sa mga anak sa Israel sa Dios, pagbiya nila sa Dios, pagkapildi nila sa ilang mga kaaway, paghinulsol nila ngadto sa Dios diha sa ilang kasubo, pagkaluwas nila pinaagi sa mga maghuhukom, ug pagkadaot na sab; nahimo kining tuyok nga kapito nasublisubli diha sa Mga Maghuhukom—1:1-2; 2:11—3:11.

II. Gihisgotan sa Mga Maghuhukom 2:1 ang Manulonda ni Jehova—5:23; Num. 22:22:

- A. Ang Manulonda ni Jehova mao ang Dios mismo sa Diosnong Trinidad Niya nga nag-alagad sa Iyang mga pinili ingog Sulugoon—itandi sa Heb. 1:14.
- B. Ang pagkalawas sa Tulo-usang Dios mao si Cristo, ug si Cristo ang Manulonda ni Jehova, nga nangatiman sa Israel ingon nga Jehova nga nagbuhat sa Daang Tugon—Exo. 3:2, nota 1.

- C. Nagpasabot kanang Manulonda ni Jehova si Cristo nga gitudlo ug gitahasan sa Dios ang Iyang Kaugalingon sa Diosnong Trinidad Niya nga mobuhat sa pagpangatiman sa Iyang katawhan.
- D. Kay wala man maggawi ang Israel ingog tarong nga asawa, si Jehova mismo nga Bana, ang Ulo, ug ang Hari sa Israel nahimong Sulugoon sa Iyang asawa:
 - 1. Nianha si Jehova niya dili ingog Bana, Ulo, o Hari kondili Manulonda ni Jehova, nga gipadala ni Jehova—Zac. 2:9-11.
 - 2. Kay wala man tagda sa Israel si Jehova ingon nga Ulo, nahimo Siyang Sulugoon nga moalagad niya; ang pulong Niya alang sa Israel sa 2:1-3 dili pagbadlong o sugo ba kondili pagmaymay sa sulugoon.

III. Gipadayag sa Mga Maghuhukom 17 ug 18 ang apostasiya sa Israel sa pagsimba nila sa Dios:

- A. Nagpasabot ang apostasiya sa pagbiya sa paagi sa Dios ug paggamit og laing paagi aron mosunod sa mga butang gawas sa Dios, ug pagbuhat kinig mga butang para sa kaugalingon sa ngalan ni Jesucristo ug sa pasumangil nga pagsimba sa Dios—Buh. 9:2; 18:26; 2 Ped. 2:2, 15, 21; Jud. 11; Huk. 18:30-31.
- B. “Naay balay sa mga dios ang tawo nga si Miqueas; ug naghimo siyang ephod ug teraphim, ug gikonsagrar ang usa sa iyang mga anak nga lalaki nga mahimong iyang sacerdote”—17:5:
 - 1. Ang balay ni Miqueas ingon nga balay sa mga dios, lakip na ang mga diosdios niini (nga mga puli ni Cristo), ang ephod niini (nga nagrepresentar sa pagbulot-an sa Dios), ug ang sinuholang sacerdote niini (nga nagrepresentar sa sistema sa klerigo-kasagarang mga magtutuo, vv. 7-13), nagpakita sa apostasyanhong sitwasyon kalabot sa pagsimba sa Dios diha sa mga Cristohanon karon.
 - 2. Dunay gihalad sa Dios ang inahan ni Miqueas, apan nasagolan sa levadura sa pagsimbag mga diosdios ang halad niya (vv. 1-4); naa sa Cristianidad ang samang sambog ug apostasyanhong sitwasyon.
 - 3. Mahimong iaplikar nato ang hulagway sa “balay sa mga dios” ni Miqueas (v. 5) sa sitwasyon sa Cristianidad.
 - 4. Dagdag “balay ni Miqueas” ang Cristianidad karon; ang Simbahang Romano Catolico, ang nasodnong mga iglesia, ang mga denominasyon, ug daghan sa independenteng mga grupo “mga balay ni Miqueas,” nga puno sa mga diosdios nga mga puli ni Cristo.
- C. “Gipatindog sa mga anak ni Dan alang sa ilang kaugalingon ang kinulit nga diosdios,” ug “gipatindog nila ang kinulit nga diosdios nga gibuhat ni Miqueas sa tanang panahon nga naa ang balay sa Dios sa Shilo”—18:30-31:
 - 1. Ang apostasiya ni Dan mao ang pagpatindog og mabahinbahinong sentro sa pagsimba—17:9-10; 18:27-31; 1 Har. 12:26-31.
 - 2. Nakig-away si Dan ingog nati nga leon aron madugangan pa gyod ang iyang yuta (nga naghulagway ni Cristo), apan sa nilampos ug nidaog na siya, nagmapagarbohon, nagtinagsa, ug nagkinaugalingon siya—Deut. 33:22; Jos. 19:47; Huk. 18:27-31.
 - 3. Ang nabatonan sa mga taga-Dan naghimo nilang mapagarbohon ug makinaugalingon, dili gustong mopasakop sa gitudlo sa Ginoo—vv. 1-31; Deut. 12:5, 8:
 - a. Kay nagmalamposon man si Dan, nahimo siyang mapagarbohon ug makinaugalingon; nagtagad ra siya sa iyang kaugalingon, ug wala magtagad sa uban—33:22; Huk. 18:27-31.

- b. Ang gigikanan sa apostasiya ni Dan naa sa kawalay-pagtagad niya sa ubang banay; ang kawalay-pagtagad nato sa ubang bahin sa Lawas maoy gigikanan sa apostasiya.
 - 4. Walay labaw pa kamasal-anon o nakadaot sa katawhan sa Dios sa tibuok kasaysayan sa Israel kaysa apostasiya ni Dan sa pagpatindog og mabahin-bahinong sentro sa pagsimba—Gen. 49:16-18; Deut. 33:22; Huk. 18:1, 30-31.
 - 5. Gitukod ang tanang mabahinbahinong sentro alang sa kaugalingong tinguha; dili lang nga makaingon sa pagkabahin kanang batasana kondili sa pagkompetensyahay sab—vv. 1, 13-31; Gen. 49:16-18; Deut. 33:22:
 - a. Naa sa Shilo ang tabernaculo, ug naa sa Dan ang linilok nga larawan—Jos. 18:1.
 - b. Gipatindog nila ang kinulit nga diosdios...sa tanang panahon nga naa ang balay sa Dios sa Shilo”—Huk. 18:31; 1 Sam. 1:3.
 - 6. Sa kasaysayan sa Cristianidad daghan ang mga “Dan,” nga dili gustong magpasakop sa uban ug nagpatindog hinuog laing sentro sa pagsimba—Huk. 18:1, 13-31.
 - 7. Ang labing maayong paagi nga mapanalipdan ta aron dili mahulog sa apostasiya pagtagad man sa tibuok Lawas ug sa bugtong-talagsaong panghima-tuod sa Ginoo diha sa usang buhat Niya—1 Cor. 10:17; 12:12, 27.
- D. Dunay kusganong panagna sa Biblia nga sa dili pa mobalik ang Ginoo duna unyay dakong apostasiya diha sa Iyang katawhan—2 Tes. 2:3:
 - 1. Dili moabot ang adlaw sa pag-anhi sa Ginoo kon dili pa moabot og una ang apostasiya—vv. 2-3.
 - 2. Pagtipas kining apostasiyaha sa tul-id nga dalan sa pamatigayon sa Dios nga gipadayag sa Kasulatan—1 Tim. 1:4; Efe. 1:10; 3:9.
 - 3. Bisan karon dunay hilig diha sa pipila ka Cristohanon nga mobiya sa tul-id nga dalan sa Bag-ong Tugon—2 Ped. 2:15.
- E. Ang nagpaluyong kahimtang ug luwan sa 2 Pedro mao ang apostasiya—pagsimang sa hustong dalan sa kamatuoran sa Dios—2:1:
 - 1. Nakapasimang sa mga magtutuo gikan sa pamatigayon sa Dios ang apostasiya sa pagdala kanila ngadto sa tawhanong pangatarongan sa makalibog nga mga pilosopiya—Col. 2:8.
 - 2. Ang pagtulon-an sa mga apostasyanhon wala magdala sa mga magtutuo nga mokaon sa kahoy sa kinabuhi, nga naghatag og kinabuhi, kondili moambit hinuon sa kahoy sa kahibalo, nga nagdalag kamatayon—Gen. 2:9, 16-17; 2 Cor. 11:2-3, 12-15.
 - 3. Ang sangkap sa kinabuhi ug ang pagpadayag sa kamatuoran maoy mga tambal nga gigamit ni Pedro batok sa apostasiya—2 Ped. 1:3-21:
 - a. Sa mga versiculo 3-11 gigamit ni Pedro ang sangkap sa diosnong kinabuhi alang sa hustong Cristohanong kinabuhi sa pagbakuna batok sa apostasiya.
 - b. Sa mga versiculo 12-21, gigamit niya ang pinadayag sa diosnong kamatuoran sa pagbakuna batok sa erehiya diha sa apostasiya—2:1, nota 3.
 - 4. Kay puno man sa apostasiya ang Cristianidad karon, nagkinahanglan ang Ginoo og pagpahiuli—ang pagpahiuli sa kinabuhi ug kamatuoran—Juan 1:4; 8:12; 10:10; 14:6; Bug. 2:4, 15.
- F. Karon, sa panahon sa apostasiya, manghimatuod gyod ta sa hingpit nga pinadayag sa lunsayng Pulong sa Dios ug makig-away alang sa mas lalom nga mga kamatuorang gipadayag sa Pulong sa Dios, lakip na sa:
 - 1. Pinadayag bahin sa walay kataposang pamatigayon sa Dios—Efe. 1:10; 3:9.

2. Pinadayag bahin sa Diosnong Trinidad—2 Cor. 13:14; Bug. 1:4-5.
3. Pinadayag bahin sa persona ug buhat sa malangkobon-sa-tanan nga Cristo—Col. 2:9, 16-17; 3:11.
4. Pinadayag bahin sa nahingpit nga Espiritung taghatag-og-kinabuhi—Juan 7:39; 1 Cor. 15:45; Bug. 22:17.
5. Pinadayag bahin sa walay kataposang kinabuhi sa Dios—Juan 3:15-16.
6. Pinadayag bahin sa Lawas ni Cristo, nga mao ang iglesia sa Dios—Efe. 1:22-23; 1 Cor. 12:12-13, 27; 10:32.